



REPUBLIKA E KOSOVËS / REPUBLIKA KOSOVA

GJYKATA THEMELORE PRISHTINE

Numri i lëndës: 2019:112211

Datë: 29.01.2021

Numri i dokumentit: 01458711

P.nr.540/18

NË EMËR TË POPULLIT

**GJYKATA THEMELORE NË PRISHTINË**/Departamenti i Përgjithshëm, Divizioni Penal, në përbërje nga gjyqtari i vetëm gjykues Ertan Sejfulla, me zyrtaren ligjore Sadije Sogojeva, në çështjen penale ndaj të akuzuarit A. Z., i akuzuar sipas aktakuzës së Prokurorisë Themelore në Prishtinë Departamenti i Përgjithshëm, PP/II.nr.273/18 të datës 31.01.2018, për shkak të veprës penale Lidhja e paautorizuar në shërbime nga neni 321 i KPRK-së, pas mbajtjes së shqyrtimit fillestar, të hapur për publikun, të mbajtur më datë 28.01.2021, në të cilin ishin të pranishëm Prokurori i shtetit Ferdane Sylejmani dhe i akuzuari, të njëjtën ditë, mori dhe publikisht, shpalli këtë:

**A K T G J Y K I M**

**I akuzuari: A. Z.**, i biri i H. dhe nënës E., i lindur me ....., në fshatin B.-O., ku edhe banon në rr."..."", nr..., me nr. personal ....., shqiptar, shtetas i Republikës së Kosovës.

**ËSHTË FAJTOR**

**S e p s e:**

Me datë 15.11.2017, në shtëpinë e tij në fshatin B., O., ka shfrytëzuar energjinë elektrike në mënyrë të kundërligjshme, ku pa autorizimin e furnizuesit të autorizuar KEDS, ka keqpërdorë energjinë elektrike në atë mënyrë që ka bërë rikyçje në rrjetin elektrik përmes një kabloje, duke anashkaluar njehsorin elektrik, me qëllim të shmangies së regjistrimit të energjisë elektrike të shpenzuar, me ç'rast KEDS-it, i ka shkaktuar dëm material në vlerë prej 393.47 euro,-

- me këtë ka kryer veprën penale Lidhja e paautorizuar në shërbime nga neni 321 i KPRK-së,

Prandaj, gjykata në bazë të neneve: 7, 17, 21, 41; 49; 50; 51; 52; 73 dhe 321, të KPRK-së, si dhe nenit 365, të KPPRK, i shqipton:

**DËNIM BURGIMI ME KUSHT DHE GJOBË ME KUSHT**

**Të akuzuarit: A. Z.,** i shqipton dënim me burg në kohëzgjatje prej tre (3) muaj dhe dënim me gjobë në shumën prej dyqind (200.00) €, të cilat dënime nuk do të ekzekutohen në afat prej një (1) viti, në qoftë se i akuzuari gjatë kësaj kohe nuk do të kryej vepër të re penale.

**Shpenzimet** e procedurës penale do të paguhën nga mjetet buxhetore të gjykatës.

Pala e dëmtuar KEDS– Prishtinë, për realizimin e kërkesës pasurore-juridike udhëzohet në kontest të rregullt juridiko-civil

## ARSYETIMI

Prokuroria Themelore në Prishtinë/Departamenti i Përgjithshëm, me aktakuzën PP/II.nr.273/18 të datës 31.01.2018, ka akuzuar të akuzuarin A. Z., për shkak të veprës penale Lidhja e paautorizuar në shërbime nga neni 321 i KPRK-së.

Në seancën e shqyrtimit fillestar, të datës 28.01.2021, pas leximit të aktakuzës nga prokurori i shtetit, të akuzuarit i është dhënë fjala që të deklarohet lidhur me fajësinë për veprën penale e cila i vihet në barrë dhe i njëjti ka deklaruar se e ka kuptuar aktakuzën dhe e ka pranuar fajësinë për veprën penale për të cilën është akuzuar, duke shtuar se pendohet për veprën e kryer, i njëjti deklaroi se veprën e ka kryer në pamundësi për ta paguar, jam mbajtës i familjes pesë anëtarësh, shtëpinë ma kanë ndërtuar me ndihma, jam i gjendjes së varfër ekonomike, jetojmë me ndihma sociale, andaj kërkoj nga gjykata një dënim sa më të butë.

Sa i përket pranimi të fajësisë nga i akuzuari, Prokurori i Shtetit ka deklaruar se pranimi i fajësisë nga i akuzuari është bërë konform dispozitave të KPP-së, si dhe në përputhshmëri me provat të cilat gjenden në shkresat e lëndës, ndërsa i ka propozuar gjykatës që të njëjtën ta aprovoj.

Pas deklarimit të akuzuarit se ndihet fajtor për kryerjen e veprës penale për të cilën është akuzuar nga Prokuroria, gjykata me aktvendim ka pranuar pranimin e fajësisë nga i akuzuari, pasi që është bindur se i akuzuari e ka kuptuar natyrën dhe pasojat e pranimi të fajit, po ashtu ky pranim është bërë vullnetarisht dhe është mbështetur në faktet e çështjes që përmban aktakuza.

Po ashtu, edhe nga shkresat e lëndës, gjykata gjeti se në veprimet e të akuzuarit ekzistojnë të gjitha elementet e veprës penale Lidhja e paautorizuar në shërbime nga neni 321 i KPRK-së, si dhe vërtetoi gjendjen faktike, të përshkruar si në dispozitiv të këtij aktgjykimi, prandaj gjykata e shpalli fajtor të akuzuarin, pasi që më parë gjeti se është penalisht përgjegjës.

Me rastin e përcaktimit të llojit dhe lartësisë së dënimit, gjykata mori parasysh të gjitha rrethanat që ndikojnë në llojin dhe lartësinë e dënimit, kështu që ndaj të akuzuarit gjykata mori në konsideratë rrethanat lehtësuese si: pranimin e fajësisë nga ana e të akuzuarit për vepër penale të kryer; pendimin e të akuzuarit, i njëjti është mbajtës i familjes, është i gjendjes së dobët ekonomike dhe faktin se i akuzuari më parë nuk ka qenë i dënuar dhe ndaj tij nuk zhvillohet procedurë tjetër penale, ndërsa gjykata nuk gjeti ndonjë rrethanë veçanërisht rënduese, prandaj të akuzuarit i shqiptoi dënim si në dispozitiv të këtij aktgjykimi, me bindje se dënimi i shqiptuar, i përgjigjet shkallës së rrezikshmërisë shoqërore të veprës penale për të cilën edhe është shpallur fajtor, si dhe shkallës së përgjegjësisë penale të akuzuarit dhe se me dënimin e shqiptuar kundër tij, do të arrihet qëllimi i dënimit i paraparë me nenin 41, të KPRK-së, e që konsiston në parandalimin e të akuzuarit nga kryerja e veprave penale në të ardhmen dhe të bëjë rehabilitimin

e tij, të parandalojë personat e tjerë nga kryerja e veprave penale dhe të shpreh gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

Vendimi mbi shpenzimet e procedurës penale dhe paushallit gjyqësor, u mor në bazë të nenit 453, par. 4, të KPP-së.

Vendimin për kërkesën pasurore-juridike gjykata e bazoi në nenin 463 par.1 dhe par.2 të KPP-së.

Nga sa u tha më lart, dhe në bazë të nenit 248 dhe 365 të KPP-së, u vendos si në dispozitiv të këtij aktgjykimi.

Ky aktgjykim është përpiluar me datë 29.01.2021.

**GJYKATA THEMELORE NË PRISHTINË**

Departamenti i Përgjithshëm/Divizioni Penal

P.nr.540/18, datë 29.01.2021

Zyrtarja ligjore,  
Sadije Sogojeva

---

Gjyqtari,  
Ertan Sejfulla

---

**UDHËZIMI JURIDIK:**

Kundër këtij aktgjykimi, ankesë mund të paraqesin personat e autorizuar brenda pesëmbëdhjetë (15) ditësh, nga dita e dorëzimit të kopjes së aktgjykimit. Ankesa bëhet përmes kësaj Gjykate, për Gjykatën e Apelit në Prishtinë.